

Gobierno lo pasa 512 cas den man di FCCA

**No ta intencion pa saca ningun hende for di nan cas*


ORANJESTAD (AAN): Edwin Tromp, Director di FCCA a aclarea e rumor relaciona cu lo bay saca 512 famia di nan cas. Esaki pa motibo cu FCCA a bira doño di e casnan.

Tromp a splica den entrevista cu DIARIO cu for di aña 1995, Gobierno a cuminsa ofrece su clientenan, e tempo ey, pa cumpra e casnan.

Esey ta un proceso cu a sigui. Na aña 2016, FCCA hunto cu gobierno a yega na un palabracion formal, cu FCCA tin cosnan cu e tin cu paga gobierno y gobierno tabata tin cosnan cu e mester a paga FCCA, a señalá.

A yega na un convenio, cu e tempo ey Parlamento a aproba, cu ta pasa e casnan ey pa FCCA y asina ta 'saldear'. Esey a sosode, a bisa.

"Lastimamente e tempo



ey, e parti di traspaso, si mi a compronde bon, no tabata den e ley. Ora bo kier traspasa algo di gobierno pa un hende tin un formalidad cune, anto e minister mester haya un poder pa haci'e", Tromp a splica.

Pesey for di aña pasa, FCCA a pone hopi

atencion y hunto cu DIP, Kadaster y otro nan como e ministerio riba su mes, kier termina e parti ey.

Aworaki ta asina leu caba cu a aproba esaki y ta wardando ariba e formalizacion, Un bes cu ta formaliza e casnan lo wordo pasa huridicamente ariba nomber di FCCA.

Den e grupo di casnan aki tin casnan cu ta ta full paga. Pero huridicamente no por a pasa e casnan aki.

FCCA ta conseha e clientenan pa cuminsa bay notario pa asina pasa e casnan pa nan. Nan tin cu tene cuenta unicamente cu e gastonan di notario.

Tin otro nan cu FCCA mester financia nan, Edwin Tromp a indica.

E casnan aki ta rond Aruba. Tin na Canashito, na Savaneta, San Nicolas, Madiki, etc. Te cu 2016, Tromp a bisa, e doñonan di e casnan tabata tin acuerdo cu Gobierno caba. Despues di 2016, FCCA ta wak na ki balor nan ta bende e casnan aki.

Akinan ta trata di hendenan cu ta bibando den e casnan pa hopi aña caba y no tin intencion di bay saca ningun hende. Esey tabata e rumor cu tabata core, pesey e director di FCCA a aclarea cu esey no ta e caso.

Asina cu e casnan ta huridicamente den man di FCCA, nan deber ta pa bay cumpli cu tur hende cu tin e acuerdo caba cu gobierno, a remarca.